

四庫全書

集部

欽定四庫全書

集部
待制集
總目
卷二

詳校官中書臣呂光復

侍讀臣孫球覆勘

總校官進士臣楊懋珩

校對官中書臣楊世綸

謄錄監生臣張德燾

欽定四庫全書

集部五

待制集

別集類四元

提要

臣等謹案待制集二十卷元柳貫撰貫字
道傳浦陽人大德四年薦為江山縣教諭
延祐四年授湖廣儒學副提舉六年改國
子助教至治元年遷博士泰定元年擢太
常博士三年出為江西儒學提舉至正元年

擢翰林待制兼國史院編修官僅七月而卒
故世稱柳待制焉事蹟附載元史黃潛傳貫
雖受經于金履祥其文章軌度則出於方鳳
謝翱吳思齊方回龔開仇遠戴表元胡長孺
其史學及掌故舊聞則出于牟應龍具見宋
濂所作行狀中學問淵源悉有所授故其文
章原本經術精湛闕肆與金華黃潛相上下
早年不自存稿年四十餘北游燕始集為游

稿其後有西陂稿容臺稿鍾陵稿靜儉齋稿
西游稿蜀山稿至正十年余闕得稿於貫子
自以濂及戴良皆貫門人屬其編次凡得詩
五百六十七首文二百九十四首勒為二十
卷闕及危素蘇天爵各為之序濂為之後記
天爵序又稱有別集二十卷今未見其傳本
考濂記稱尚餘詩九百七首文二百四十八
首謄為二十卷授先生子自藏之蓋刪汰之

餘本未刻也以數計之詩僅存十之四文僅存十之六宜其簡擇之精矣附錄一卷雜載誥勅祭文像贊行狀墓表之屬不知何人所編卷首亦題曰柳貫著其謬陋可想又墓表今在黃潛集中而題曰戴良記舛駁尤甚以所記較史為詳尚可考貫之始末姑仍其舊本存之云爾乾隆四十三年四月恭校上

總纂官

臣紀昀

臣陸錫熊

臣孫士毅

總校官 臣陸費墀

欽定四庫全書

集部五

待制集總目

別集類四
元

卷一

五言古詩

卷二

五言古詩

卷三

七言古詩

卷四

五言律詩

五言長律

五言絕句

卷五

七言律詩

卷六

七言律詩

七言拘律

七言絕句

卷七

制

誥

表

箋

狀

祝文

策問

卷八

謚議

卷九

碑銘

頌

卷十

墓誌銘

卷十一

墓誌銘

卷十二

墓誌銘

塔銘

墓表

輓誌

卷十三

銘

辭

贊

箴

傳

書

卷十四

記

卷十五

記

卷十六

序

卷十七

序

說

卷十八

題跋

卷十九

題跋

卷二十

行狀

祭文

誄

啟

附錄

待制集原序

天地之化物類人事之理久則敝敝則革革則章章非敝
無革非革無章吾何以知其然也在易之革革之卦貞
離而兌悔離文也時至於革則其敝也久矣夫兌離所
勝者也物敝當革雖所勝者熄之故兌革離夫惟革其
故而後新可取故革其文者乃所以成其文也近取諸
物若虎豹之文非彪然炳也及久而敝則黝昧麗雜
曾不若狴狴之革而章者也四離之終而革之時也五

與上革之功也故五為虎變而上為豹變以其世考之
成周之文唐虞以降之所未有也至孔子之時乃大敝
矣周公聖人也曷不為是勿敝之道以貽其子孫以傳
之天下後世使之守而無變哉蓋物久而敝理也理之
必至聖人亦末如之何也孔子之作春秋或者以為絀
周之文崇商之質夫豈盡然以其告顏子四代之制與
夫後進禮樂者觀之則其所損益者可知也由周而來
亦可槩見漢之盛也則有董子賈傳太史公之文東都

而下則敝而不足觀也唐之盛也則有文中子韓子之
文中葉而下則敝而不足觀也宋之盛也則有周子二
程子張子歐魯之文南遷而下則敝而不足觀也夫何
以異于虎豹之文彪然炳也及久而敝則黠昧麗雜曾
不如狴狸之革而章者哉文之敝至宋亡而極矣故我
朝以質承之塗彩以為素琢雕以為朴當是時士大夫
之習尚論學則尊道德而卑文藝論文則崇本實而去
浮華蓋久而至于至大延祐之間文運方啟士大夫始

稍稍切磨為辭章此革之四而趨功之時也浦江柳先生挾其所業北游京師石田馬公時為御史一見稱之已而果以文顯由國子助教四轉而為翰林待制兼國史院編修官蓋先生蚤從仁山金先生學其講之有原而淬礪之有素故其為文縝而不繁工而不鏤粹然粉米之章而無少山林不則之態惜其未顯而已老欲用之而已沒也余在秋官時始識先生嘗一再與之論文甚懼比以公事過其家問其子孫得其遺文凡若干篇因

使先生弟子宋濂戴良彙次之將畀監縣廉君刻之浦
江學官世有欲徵我朝方新之文者此其一家之言也
必有取焉因題其卷首以俟至正十年八月丁祀日武
威余闕序

天之生才所以資一世之用使之盡其才者天子宰相
之事也千尋之木產乎高厓深谷人蹟所罕至之地匠
石之欲營宮室者猶必仰而取焉況于人才之足以為
邦家立太平之基者乎詩曰藹藹王多吉士惟君子使

善治其天下國家者宜於此乎留意焉可也方仁宗皇帝在位崇尚儒術蓋朝廷極盛之時于是浙水之東有柳先生道傳出執政有知之者用之於成均又用之於頌臺焯有譽聞及出提舉江西儒學滿秩而還家食者復一紀至正初今皇帝召還為翰林待制將進用之而先生以疾卒于官方先生為國子助教監察御史馬雍古公伯庸薦先生可任風紀御史大夫特克實不從江西之遷在朝之人有忌嫉之者扼而不用及公道既明將

寘館閣而先生老矣故其所學百不一見于功業所以傳示來世者獨賴文章之存而已先生少歷遊前代遺老之門該綜百氏根極壺奧故其文雄渾嚴整長于論議而無一語襲陳蹈故蓋傑然于當時者也先生既沒門人宋濂戴良類輯為二十卷而屬素序之先生官豫章素以諸生見焉訓誘獎厲久而彌篤知先生之得於天者不可謂薄顧阨于人者遑遑若是是故讀其文而惜其才之不盡用也臨川諸生應奉翰林文字文林郎

同知制誥兼國史院編修官危素序

翰林待制柳公既卒子貞藏其文若干篇至正庚寅浙東僉憲余公按行所部以浦江監縣廉君清慎有為愛民重士乃命刻其文傳焉昔宋南渡樹都錢塘浙東為股肱郡衣冠大家接武于廷名公碩士相繼而起汪洋博洽之學辯論宏偉之文人自為書家有其說嗚呼盛矣哉至元中海內為一故國遺老尚有存者師友講授淵源不絕大抵皆以殫見洽聞為主天爵竊祿于朝三

十餘年其于浙東鉅儒猶或及識故翰林侍講學士袁
文清公及公而已間嘗接其論議誦其文章奇辭奧語
層見疊出信知非因陋就寡之士所能及哉嘗考南渡
之初一二大賢既以其學作新其徒呂成公在婺學者
亦盛同時有聲者有若薛鄭之深淳陳蔡之富贍葉正
則之好奇陳同父之尚氣亦各能自名家皆有文以表
見于世其為文也本諸聖賢之經考求漢唐之史凡天
文地理井田兵制郊廟之禮樂朝廷之官儀下至族姓

方技莫不稽其沿襲究其異同忝謬誤以質諸文觀會
通以措諸用讀公之文者庶猶見其兆歟故公施教訓
于成均則胄子服其學司議論于奉常則禮官推其博
天子方召入禁林而公年已老矣惜乎文之不大顯于
世也其制作規模之盛則于鄉之先正有足徵焉嗟夫
水貴有原文貴有本儒者之學貴乎多聞之為尚也然
而擇之必欲其精語焉宜中乎度非誇多鬪靡以為能
也孟子曰博學而詳說之將以反說約也胡氏曰學欲

博不欲雜欲約不欲陋旨哉言乎廉君名額能巴哈字
景淵為至元名相文正王諸孫家世清白故治縣有聲
其子賦役推考均一可行永久民深德之今刻文集二
十卷別集又二十卷皆公門生宋濂戴良所彙次云通
奉大夫前江浙等處行中書省叅知政事蘇天爵序

欽定四庫全書

待制集卷二

元 柳貫 撰

古詩

五言

擬古次吳彥輝編修見寄韻

昨夕芳蘭英今晨寒露霱凡物榮悴之所慎在交友燕
燕參差飛尚自求其偶何況萬里心僅若風中柳服君
無流黃貽我有佩玖感歎臨長河何山近牛首驅馳苟
可及羸囊具我糗但恐川塗修所期非所有

秋曉行園覽物三詠書寄臨川孫履常

苦瓠若懸癭宜瓢亦宜笙
笙將用合雅瓢以供酌烹
吾為苦瓠謀任力不任聲
薦勞鋤鼎開自足資養生
物賤終反質吹萬豈其情

其二

庭後雙桐樹當春各揚熙
方華俟其實匪為鳳皇飢
逡巡白露下時變物乘之
陽柯色黯黯陰榦兀頽頽
朝曦與夕暉同煦亦同吹
君看特立者至德豈下衰

其三

蓬艾著莖穎其高論尋尺在時蒼翳中初不自揀擇秋
風一披猖東藁共狼籍兒童強解事走報蒼生策是物
豈能伸虛名偶相迫四營爾何知無徵安有獲呼兒告
之故吾占用吾易

墻東蒔青菊

墻東蒔青菊墻西種叢萼萼高菊尚卑俯仰作秋意森
修已盈束張王密相比飄風日淒淒榮悴忽殊位一為

斬艾侵坐闕藩籬蔽以茲感時物回復臨軒砌孤華耀
黃艷迴立有餘地馨香不滿把零落還自致夕餐詎能
飽根蒂已中棄冀除莠何慚羨爾身後計

九月廿八日迎大駕至昌平縣

回鑾向京闕佳氣拂天來千官肅迎謁奔走及輿臺前
瞻直南口帳殿層雲開駝鈴遠有響象馭不驚埃却輦
升玉座甫進蒲萄醅侍儀主奉引喚仗聲如雷雕盤薦
桃實磊落推玫瑰庶明土物愛敢覲天顏回退旅稱萬

歲俛首三徘徊聖人乘六龍宣光照九垓茲地適頓轡
秋陽薄崔嵬蠲復周黎庶宴見先背台繼體如舜禹其
仁已深培陋儒職為頌感奮慚非才

奉皇姑魯國長公主教題所藏巨然江山行舟
圖

善畫如攻詩意到即奇警蓋其踈儻姿筆墨無容騁欽
之縑楮間咫尺萬里景巨然作江山所得盡幽負冥深
風雨重曠朗雲霞屏秋光滿帆腹上下天一影白鳥不

盡飛楓林有維艇稍前牛渚磯卻後瞿塘頂豈無乘航
戒尚想然犀炳巨靈制坤軸割截爾何猛至今氣淋漓
幅背出光耿人言此非畫與幻本同境然師豈幻者貞
勝以其靜我來覽遺迹皦若天機秉巫閭東北長岷蜀
西南永朱邸雪消初春暉浮藻井開圖望神州時節躬
朝請慨思禹功成重喜殷邦靖將鑄獄牧金明堂安九
鼎

袁伯長侍講伯生伯庸二待制同赴北都卻還

夜宿聯句歸以示子次韻効體發三賢一笑

杜詩詫蜀險高有石櫃閣安知居庸口可掠太白腳馬
行已崇巔鳥度尚層壑林蹊曠迷轍崖井荒苗幕俯疑
日沉車閒若風鼓橐玄雲倏揚旆朱霞粲塗轡數驛程
非賒艱裘寒更薄客魂逢酒銷鬼膽因詩愕蟠木將為
容胡繩未宜索嚴召戒晨趨澄旻際秋廓紫微晶煥爛
瀚海氣冥漠腰無兩鞬屬道有五丁鑿弭轡誰所援還
衡猶屢錯小息樹吟旌爭先厲詞鏘非開石首筵似聽

鄧城拆巨敵無前勅偏師當後却

送張子昭經歷赴淮東

嚴嚴御史府瑩瑩聚英彥計今玉笋班顯者半郎掾居
中密告猷治外詳論讞我遊朝士間聞談輒心羨胡為
三十年負此一破硯子昭每相過開口竒自見弘璧本
不貲况復加藻薦安能辭富貴尚欲志貧賤平明借馬
出向夕擁書倦去年參元火可賀亦可唁端公坐南床
愛士誠睠睠屈君廉訪幕首路走淮甸生平書檄手妙

在巧裁剗誰無擾獄市勿使滋蔓延平反奉慈母歡喜
潔羞膳君子既得興小人將革面想當治曹暇稍稍事
遊宴試茗蜀井岡看花西竹院古思浩無邊新語時一
轉定懷京遊舊寄贈比黃絹交情二紀餘此別良繾綣
徃時媚學侶散若風蓬旋今我亦老醜尚復把經卷分
襟各回首絮點雜花片重來都門道迎子十乘傳

送貢泰甫南歸覲省

簡材適南山觀水至東匯形生蹙舒間智出尋尺外自

我入西廡羣士日參會謬云持一鑑豈敢當品裁貢生
晚實來見即加畏愛時時片語出高爽無猥碎進從衿
佩行退察輩流內器許不異口嘲評絕憎背屬方引自
近已迫期而代我老如枯蛙於爾資沃漑胡為忽有行
言買歸舟載一陰月更朔魄死明始朏長河夜來雨物
色饒生態去者遂翺翺留者誠拘闕狗名苦求益或乃
譏賣菜永愧堂上翁所樂清淨退寧將五粒松換此雙
龍焙舊學待表微新聲行起躡趨庭重有聞作氣應再

倍必觀正令申靡恤偏師北低昂與禽縱用處無不在
終然爍火光豈掩日中沫我歌實勞勞爾思母昧昧眷
言蕙草秋霜露不相貸

文子方寓直翰林數日即以使往雲南典選詩
用識別

聖人御世具黜陟用明幽恒持萬里見若與一室謀滇
池出西南疆理亦中州皇明所照燭廣强悉恬柔緬懷
國利器爵祿廼戈矛稍垂銓鑒宗將貽繭絲憂況提天

官書往即外府籌考擇命詞臣得無慎其由翰林文夫子見謂能言流受詞別知友大斗醕不酬襍被辭夜直出門戒晨駒選材古所難此事若冥搜豈無甲乙簿珠礫同一收施施處士議勞勞城者謳太史制褒貶在子用春秋將令周道正遑卹楚人咻循吏果再見斯民庶其瘳得結數十輩參錯置邊陲上以昭王度下以振儒猷吾徒分阨遠被服在林丘

謝無疑將歸延平菑詩為別次韻四首

裘葛亦何事為人司暑寒微哉一封垤欲等嵩華看如
將射變率未免噎廢餐我貧不自遂早知行路難解后
與君別好懷詎能安為語南飛鴻雪跡何時漫

其二

數路欲求賢當宁席為側書生無籍名咫尺不得夕區
區冷官調自視培風翼坎盈豈能亨井渫誰為惻樂哉
歸去辭河流夜來急

其三

龜山載道南伊闕無全書遜翁受李氏一軌行衆塗如
人執著蔡於物察鳶魚至今表鄉學粹美不迂迂得君
羈旅中滯念盡刊除譏評世亦有鑒在我豈虛唯應雙
劍光賁子幽貞廬

其四

服官如服賈苟利無不然間關遠行邁肇彼車牛牽亦
越南北垂不間東西阡蹇予拙於用蓬飄逐回旋可能
食無魚自詫筆如掾好友不可呼逝去猶飛烟誰歟重

晨招謝爾嘲晝眠泥塗肯再辱況欲使之年離絃不成
曲麟膠我當煎

次伯庸韻賦苦寒三首

我衣䟽布縫彼裘衆毛集將微禦冬具柰此飛霰夕衣
完幸掩脛裘溫更重醲燠寒非爾私寧觀俟其復

其二

且無金辟寒顧有犀鎮帷窮年一莞席仰脅涕流澌敲
門求束縕彼固吝所施美哉南簷曝一煦吾敢私

其三

至日不通關謹此陰陽交我非爵祿身自視如露泡所
操無直筭謗欲彎強消巖風鑠肌骨此志徒嘐嘐

寄題天台王氏抱素齋

我琴雖無絃固亦徽軫具渾渾大璞如正以不雕故置
之空山間衆籟畢來赴誰其聆希音且復展幽步天台
三萬丈瀑水若懸布想見桃花巖風吹落新雨青鸞倘
未來白鶴已徑度太上乃忘言吾歸抱吾素

發通州至小直沽

十年鞍馬中釋去理歸櫟江光來娛人似與我意慙疲
勞省前痛歡喜獲新接念當有行初苟志在懷牒何期
腰間組爵等遂凌躡外雖被寵榮內實懼顛踣以茲戀
闕情益欲務修業清霜美晚信老樹見留葉沽河漳潞
交冰水尚可涉急漿追南鴻直不數旬浹梅花定迎笑
粲粲光生頰遠遊忘賤貧吾寧負吾缺

貫草草南歸伯生祕監方晨赴經筵馳詩見別

于舟中次韻侯便答寄兼簡伯庸贊善

講經白虎論載筆承明入此事豈在予鵷鸞正高集乞
身去江湖幸矣歸期及於何君子心繼繼念朋習新詩
比繡段重贈當珍襲因憐管蒯才分寸強紉緝賴承廷
鳳輝庶遂谷駒繫皇猷待潤色在治時所急服惟絺會
明基藉臺萊立斯文仗公等別袂不須執

過大野澤

大野自為澤濟流安得通渟涵就深廣蟠際渺西東揭

帆入洪瀾盡此一日風青山若浮髻隱見雲烟中不知
何鄉聚欲辨已冥蒙茲惟開闢水豈因䟽鑿功捐小以
成大地利廼豐崇至今徐兗郊桑麻歲芄芃賄遷擅工
賈組麗連僕童矧時漕事興舟航密如蓬寶藏在山海
其益無終窮一令民生遂坐致國本充非吾黃帽郎孰
訊白鳬翁

沽頭阻淺

傾囊作舟傭頗意遂所往進止由他人何異車在鞅沽

頭臨閘水塞淺不容漿小待得微瀾置譟爭下上強挽
纔一篙退却已數丈兩舠忽振觸石際戛餘響前船已
釋棚後船如脫襁回頭望歌岸心折猶惝恍投艱始誰
偏出險終自調却懷乘水功在易垂豕象夫知理即事
豈有患非想歸鳥尚依樊游魚亦驚網人生羈旅中百
歲徒攘攘白雲何方來相招泚予頽

雪霽得風徑過高郵

乘舟得順風如鳥新插羽覽湖五十里浪破雪花舞不

知岸勢迴歛覺帆力舉却望烟中竿參差數家聚高沙
舊遊處酒賤魚可煮伸眉一笑粲對面九疑阻得非龍
受珠逞儻挾雙鰲意令明月胎光燄閱不吐我詩初未
工聊用相媚嫵後朝妙高臺呼雲作吳語

晚渡楊子江未至甘露寺城下潮退閣舟風雨
竟夕

鼓枻凌濤江江光晚來薄相望鐵甕城正值沙水落灘
長洲渚出月黑風雨作欹眠聽春浪夢枕生新愕起吟

不成魔但怯體中惡金焦兩浮萍天塹何恨著意令制
溟渤帖帖就疏淪奈何潮汐舟咫尺眼前卻方冬百泉
縮潦淨海為壑乘流俟滿魄明夕異今昨快呼北府酒
暖客慰離索庶因行路難幸識還山樂

贈王玄翰

元貞元二襪我願未垂髯吳遊一長缺欲以鈍為銛躋
攀羣公間躑步限堂廉在我履籍正從渠藩級嚴維時
許與分金繒不徒兼坐中清觀氏願身高帽簷傾懷指

道要恐此後益殲我驚但耳受語味詎能厭謂方偶升
運豈遂歎中淹寒暑三紀餘往來如痃痞清觀已下地
白髮我日添徵言駭今見信若龜兆占斯文大圓鏡有
目人得覘奈何復反剝不遺洪入纖裼來豫章城東口
類遭拊聽談雖疊疊閉息但厭厭道逢美少年進止一
無嫌揭子為我言其人詳視瞻家微百金產架有羣書
籤煌煌定武宗緬彼世澤漸清觀我故友有子在窮閭
技富愈思蓄時來當發潛我為想顏色覆鑑併收奩邨

令毀龜玉不卒舉魚鹽促坐席屢改風回雨飄簾寒廳
惡草具觴至時一拈旋看養花法賴人加蓋苦雖承天
澤滋更畏夏光炎又聞日月華西淪則東遲藏景闕揚
曜出幽縣素蟾木功能拯渙地道有流謙育材我豈敢
贈子以安恬我歌實激烈誰為哲與黔遲歸絮我酒宿
草爾其霑

杜原父自清江訪予鍾陵畱款旬餘將還武夷

山中

原父志完潔聞道實先吾定交自錢塘暑霜二十踰京
華亦繼見失路各崎嶇區區抱兩瑟混合萬齊竽吾人
許與心固有弗占孚講談必跋燭遊行每聯裾蒙霧不
知潤披荒纔啟途君歸得超越我畱類踞拘八年忝京
秩踏鼓厭晨趨偶紆江西綬言訪玉人芻企瞻雲谷雲
隨風時卷舒夢中反招隱覺來聞過車感別欣既見相
看情紛如數宵復欵洽深懷為之攄歎息吾道存斯文
豈其孤後至邈未逢前行逝將徂寧觀以俟之曷日免

淪胥吾年屬須暇追惟刪述初英莖以論樂點畫以成
書有理有聲形道隱言亦蕪擊蒙非揣想發藪得昭蘇
新聞啟吾聽宿說詎能誣匆匆上瀨船言返粵山居慢
亭老曾孫道景驂雲輿計程兩旬浹到家改蟾蜍況茲
詩書窟咫尺文公廬漱芳酌巖液瘳道擷烟腴初非山
水淫將為造化徒定開懷友軒呼童重汎除布筵齊舊
帙掃壁張新圖友道繫倫理別久會常踈津津麗澤益
許許伐木呼詩人有行涉尚或歌叩須所以千里駕但

取一夕娛有歿與升沉蹈道本無殊跡往雖異方神遊
實同區落月屋梁色疎梅窓外株此意方寥寥微君誰
起予勉勉雞黍期茫茫冠蓋衢美詩慚報貺緬彼貂襜
褕

危太樸自金谿來訪留館兼旬因歸有贈

數日出恒早旋歸已疲劇思睡方未暝強起臨几席席
間有佳友來來千里屐所來非健羨亦不畏名迹謂吾
昔求學頗嘗窺窾卻欲要一夕談以慰百年役寤疑則

豈敢辨義能忘益斯文千載後泮渙抵離析不有高朗
姿誰完超距力夫道非遠人何嘗繫徵索譬如山出泉
其初論涓滴渟涵就深廣千流同一脉掀掀鼓雲濤帖
帖輸溟渤是氣中乘陵無吹亦無息文章道之英各亦
隨所覲草木紛以滋何嘗須粉澤生機一發越形色自
不隔吾聞古作者巖巖垂典式履正有夷途胡行猶適
堦韓公起扶衰文字欲適職取新非厭常通變由知易
衰遲豈復進溪子堅吾壁乘風迫歸期未了千日客亦

畱慰將遠芳草萋以碧諒哉君子心永言若金錫懸知
筐筥羸不廢秉穉積勉勉他日思為寄東飛翼

題湛姆授道許旌陽圖

阿姆孕氣胎萬生皆其嬰大兒太素童小兒丹元精解
后執盼悅御輪遊九清玉妃左右眄璧月東西傾逝去
八景滅畱觀三秀榮赤文大洞書纍纍滿囊盛紛吾子
弟職若昔列僊卿登壇授受已溘然乘雲征前行擁豹
節後車載霓旌鳳飛亦既遠簫勺有餘聲匪觀蹈道機

曷識顧養情茫茫大九州裨海環一瀛誰者為蟣蠓誰
者為鱣鯨稽首阿姆言吾今亦長生葆冲摠羣粹億齡
歌太平

三月廿五日予至官滿歲矣雨中言懷

去官今日雨懷組涖官初凌晨入茲宅載家借誰車既
欣就夷曠稍復加漑除前榮布筵几後檻栖琴書莞簟
已豐若庖園亦班如閤官詎免俗拙性匪求餘幸無叨
申縛兼謝朱墨拘荏苒年運往淒涼宦轍迂及暮當報

政省已媿懷居庭花不吾背簷沫屢相濡天澤自茲厚
土思邨得無億去禮寺秩久違朝士裾非才職教育希
世忝名譽常恐後啼鵠安能同賦狙此邦望吳楚其鎮
倚衡廬古人不並世下里謗工歛乍可懸我榻誰將束
彼芻青青莓苔地翳翳桑竹墟令節感慨集私憂報効
踈哦詩以自訟庶用砭其愚

宜春盧仲謨將老好遊

江水日夜下江帆朝暮開趨名與服賈什伯競沿洄豈

有挾勝具翩然動高桅桅前風水壯浪雪捲成堆奔奔
滄海入迷迷青山來易柁泛淮泗隨雲望登萊中原筵
几間恒碣兩尊壘覽古發燕歌歌上最高臺徑陳東皇
席遙酌北斗魁邨無瀛洲客引袂升九閼織女弄機杼
天章不難裁談諧得珠琲服珮綴瓊瑰手攜蟠桃實自
吟還自吟卻顧井上瓶幾為甕所輜丈夫屬有念澳忍
亦何哉借君三尺筵掃我一寸埃舉頭謝黃鵠不敢恨
低摧

三節堂詩

高昌僕輦部族望維世卿濟濟効臣順振羽邁王庭服
襲鄒魯化將由仁義行因茲命僕氏本其所從生再世
表三節秉心存一誠若昔淮安王受詔始南征都運隸
麾下實以材武名擢為主餉吏資糧有餘贏論事舉其
要賞功取其輕單提海王篇前臨百粵城禦寇適不利
忼慷死於兵其精凝為神其氣引為星雖死得死所義
烈猶光晶夫人屬盛年燈孤影竽竽寄家萬里外收涕

撫其嬰義方教以正明德祀維馨中嘗得劇疾液齊弗
能平元帥方在穉隱憂為屏營引刀割股肉和糜加飪
烹兒手奉進膳母躬欣載寧嫠居四十春門戶底重榮
何必栢舟誓旦旦申其情是家天所厚和聲協琴笙臣
忠則子孝為婦德維貞自靖以所安大節見崢嶸藝黍
黍已熟種槐槐已成築堂備賓祭大書扁中楹非徒尊
厥美固將遺世程元帥屢刺部擊姦著能聲肆今右廣
越一掃妖氛清世稱為臣表士望為國損堯然詩禮門

日以謙治盈五子各秀發文場並蜚英翩翩臺閣武疊
疊雲霄翎節義有豐報如獲必於耕翁炊而季食左右
列鉶羹飽腹亦飽人大田歲多秔普令四海饑悉得烹
殽烝濬此忠孝源澤彼疲瘵氓庶明國家盛育材樂菽
菁休屠七世孫珥貂聯珮珣奮建萬石家乘軒填里閭
是豈無本歟培覆因栽傾予忝元帥遊山立仰儀刑伯
子矧同朝蚤嘗接紳纓錢塘偶參聚話舊歡蓬萍歌有
三節章酒無雙玉瓶登堂介眉壽為子寄嚶嚶

送葉生以相墓之術西遊婺源

公劉昔居幽匪占龜獨契景岡觀流泉相土辨形位抱
陽而負陰生生此其類後乎幽為周亦卜瀍水蒞卜稽
惟洛食會同四方至宅中以圖大自時保成又遂令堪
輿家原本誇術知險固金湯如踞蟠龍虎示論都雖在
德其次當審勢茫茫大九州河山列經緯三條來自西
天馬制手轡轡振迅或驍騰安行或容屯頓塵或懣立踈
足或驚蹶或攀遊龍驤或籊浮雲逝或為春絮揚或作

瓠瓜縋錯或黼采明斷或旗旂綴大將域斯邑小則穿
彼隧墓宅如流查亦各寄所寄天地發蓋函形實不離
器若然陰映厚翕受皆沐氣所以石窆封閔世若郵置
古人重擇術耕者必斂穡不見相墓師一言興孝弟永
惟死有藏如生宅郊遂歲時履塋域魂魄瞻髣髴五行
象在天五氣應在地罔巽以順動積止無頗陂青囊一
卷書析理垂教思奈何世之人伐同以為異不有儒家
流誰其覈訛偽葉君墳史業間亦游於藝看山目光炯

挾摘破幽閼前年入天台屢揖浮邱袂去歲駕胥濤載
鼓吳門柅諸師鈴記存荒語涉奇詭冥觀領其妙射覆
不待議有來證所聞齟舌稱唯唯昔昧今已章按求初
匪貳命醕展芳筵承筐陳厚幣藝成當賞酬千金詎能
致今晨風日佳君來我方寐迎門肅而入促席談斐疊
畱行莫我以去若驚飈駛問程上江東馬銜車掛轡婆
源萬山叢壑谷宵森邃靈秀之所鍾不獨專品彙企哉
黃墩里藏策在金鑕其言實繫道大明仰東出彼邦多

俊英彪炳人門麗賓延計恐後且復羞鼎饋稊稗廼有
秋穡事豈終廢學為有用學士非以此媚蜀莊講老子
日晏坐簾肆真麗極忠孝聽者知砥礪矧是勸尊親無
窮待來裔吾誠苟未至何以承賓祭觀承非卑居洒削
猶薄伎勉勉君子心無入不弘毅荃蘭本根在芳馨期
晚歲

歲莫雜言四首

少學老無成所守但糟粕譬言如福與市涉海求靈藥豈

不望三山風至輒引卻歲闌坐窮陋青燈映踈箔雖微
白足禪自置丹霞縛賤貧吾所安飲水差足樂東隣日
椎牛得似西鄰禴

其二

中年鞍馬間所歷萬里途髀肉亦既消夢驚還一呼讀
史窺古人恨時不能俱寧知遠遊躅足躡雙飛鳬漢北
松亭塞燕南督亢圖居今永竒迹未覺吾行迂歲晚重
思之天高明月孤

其三

梅花彼粲者玉立庭戶間攝衣起從之重是水雪顏馨
香不可挽百繞亦空還我老詩力退管窺無全斑奈何
被花惱語出恐遭刪誰持明月珠置我羅浮山無詩有
重罰當爾三百鍰

其四

里中四三友論交嘗莫逆自我遠行邁廿載成乖隔今
歸僅有存生理各崩迫經時不一晤寢想猶如昔閉門

風霰中何以永令夕不見萬松根澌澌養靈魄吾寧獨
夕壽持遺同懷客

小至日獨坐誦太玄首序有感而賦

泰始十八策積終用踦羸日星相緯經去律厯廼施行
羣餘容養受盛氣自中萌君子乘其運進退無營營微
陽力雖少得與重陰爭我時掩關坐休復觀此生巔靈
尚思反闕傳以全明文規安用哉自然元道成

尊經堂詩有序

昔趙人安先生以布衣教授里中裒輯羣書
大備經訓使子若孫採擷芳華厭滿膏澤有
餘則推之以及其鄉之人焉去今五十年尊
其書猶尊先生即名其堂尊經堂曰此先生
之志也太史屬蘇君伯修嘗受經於先生之
孫最為得安氏之學者乃來請詩刻寘堂上
噫書在安氏而其淑人之功獨安氏哉詩曰
聖人言純如載道行萬世貞明配日月廣大侔天地簡

牘之所資包絡無巨細上而建皇極重觀人文麗下以
開民彝性初均秉畀訓行宣光熙道否隔氛曠千人萬
人心揭揭皆經誼此息則彼消剛柔乃殊位進乘休復
機迪哲蹈仁智自絕其根本奈何取天剝燔滅滋秦瘝
罔羅興漢利存亡書豈知論者常不置濟南耄言出孔
壁發神秘百篇始昭垂五代著成又魯齊韓毛詩其傳
迭興廢審音以知樂亦各徵四至樂崩名僅存緬想歌
鐘肆禮失野可求誰明射鄉義制氏記鏗鏘后蒼詳數

制區區象聲容詎得作者意賴夫春秋家尚識王道貴
載事或稱誣推凡疑翼偽田何受孔易其全緣卜筮揚
施孟梁徒別出踵焦費挾書律始除六籍豈俱逝傷哉
居下流衆惡所犇萃駕言拾灰殘我道猶未墜乘之以
顓門中復縻識緯黨同護朽竹攻弱擊枯魃文字日滋
滋編策亦鱗比孟荀與揚韓先後參輿衛擇精語益詳
炳炳詔來裔一籥節衆音八風無濫吹方張乃遂翕已
矣更五季大明升殿郊熒奎屬炎慧春陵南標正陝落

黃離繼經世偶潛虛象圖合而異舉隅豈無反僅若小
星嚙肫肫紫陽翁數賁瞭羣眎在時張呂間建學特趨
詣一鼓行無旁八區同教肄矧茲龍德中美化純漸被
家書動盈屋人各事康濟恭惟罔極恩聖哲布嘉惠經
尊道則尊有合巖皮寘覆之以堂庭牖戶亦崇邃古史
洎今詮珠駢而玉綴高名以經揭酌原知水味譬如登
高嶽岡阜左右睇草木流華滋烟雲撤纖翳觀生老其
間面背俱益睟豈惟一身謀直作數世計是家離石宗

遭亂藁城寄劬書白玉峯苗播實深概子孫刈其熟穰
穰收秉穗後來及門士妙合若龜契尊聞行所知況復
躬自致過逢詫師資忍負築場志我願安氏堂廣作天
下治矜式表國都弦歌行黨術蓄誠以端蒙達生以知
類惇典叙彞倫三郊而五禘與世開隆平吾經固無累
自微可之顯道豈不在器世間有形物展轉資弊弊遊
談亦何根閣束祗自棄是將彼鎮寶前人所敷遺手澤
尚鮮新一展一流涕晝誦夕思之上帝儼臨泣作詩諗

蘇子孫曾戒無替

鄭景明載醪携餉招遊左溪山訪朗大師遺跡
觀廡間李華碑命二三友生搨得墨本已復陟
東北絕巘至大師藏笈石壁下衆壑生寒夕陽
散采躊躇覽勝迨晚始歸歸而成詩

異境闕巖壑地神不輒售必逢僧寶珠窵啟方界授左
溪掖仙華山山蓄靈秀蒸霞作嵐霏洩雲出嵌竇朗公
修何行宴寂併昏晝及其止觀成白月飛光透巖巖絕

壁下臺殿聳遺構誰初藏舍利駕說包擲樞到今亂石
間鬼物嚴居守殘僧數十輩緘衲裹猿狖依憑像教力
逢年足糗糧安知大法哀已偈三季後我家一舍餘瞻
雲每東首白髮既徂齡松門乃重扣入谷變晴陰出林
占氣候西風戒新寒黃葉聚盈帚疊閣象櫓巢鱗鱗各
開牖景勝塵已空神超坐滋久摩挲李華碑楷畫辨跟
跣固惟製作精所以能不朽搨墨雖模糊尚可形篆籀
還乘不盡興更歷最高阜鞭石障外風無乃巨靈剖川

岳奠方維坤輿鰲背負豈為一比丘壽張啟荒陋不然
秉佛慧正以鑄俗謬人師弘經者此道嘗獨厚我來證
所聞山意亦知不仰睇圓顙天俯閱古今宙是山矗危
巔實自開闢有青冥逼虛空渾璞謝雕鏤中峯眎羣巘
僅若綦組綬而况原隰包遠近錯文繡灝氣方襲人落
景已銜岫從來四五客一二耆年舊餘如芳蘭苔服美
兼縑就佳哉采真游吾哀恐難又

旦發漁浦夕宿大浪灘上

張帆得順風飛鴻與爭疾後浪蹙亦舒前山過如失桐
江轉數灣上瀨未入日篙工享安便坐穩頭屢櫂人生
倚造物理微難究詰處順安可嘗離憂詎能必白鷗知
此情故向浪間沒

待制集卷一

欽定四庫全書

待制集卷二

元 柳貫 撰

古詩

五言

度居庸關

居庸朔方塞始入兩崖張行行轉石角細路縈澗岡層
壑倒天影半林漏晨光崎嶇里四十所歷萬羊腸千轅
絡前後兩軌通中央谷開稍夷曠在險獲康莊豈惟遂
生聚列厓叅鴈行激流或機磴架广亦僧坊我來山水

窟愛此不能忘是日新雨已浮嵐亂霑裳水聲與石鬪
風飄韻清商跼轡不知高游雲翼超驤考牒曩有聞經
途今始詳緬惟古塞北八州猶漢疆控扼識形勢會同
知樂康屬茲景運開六服聯綏荒兩京傷巡幸離宮爰
相望守嶽將考制如祠匪求祥式瞻龍德中足徵皇業
昌請繼王會篇勿廢祈招章

李老谷聞子規

杜老聞子規近在東西川猶云感時物投淚寫幽悵今

我行塞徼子規相後先時夏雲景晦鳥呼搖空烟響入
樹宵宵啼垂血濺濺想知岐路難不恤軀命全千聲復
萬聲喚我歸言遄苟非木石心豈免腸內煎江南叢薄
間有花名杜鵑開時是鳥至相戒治春田不歸如江水
負此今五年風土孰云異物情要有遷寄巢勿浪出祝
爾還自憐嚴程趨行邁且復揮吾鞭

龍門

一溪瓜蔓流渡者云可亂屢涉途已窮前臨波始漫巖

巖龍門峽石破兩崖半沙浪深尺餘灣洄觸垠岸它山
或澍雨湍漲輒廉悍頃刻漂車輪羈絡不能絆其源想
非遠衆水自茲濫濟淺抑何艱慮盈疑及患峯陰轉亭
午出險馬蹄散草路且勿驅烟開望前館

望李陵臺

平沙北流水青山在其上李陵思鄉臺駐馬一西向草
根舍餘淒峯尖入寒望俚言雖莫稽陳跡尚可訪想其
深入初步卒亦材壯手張天子威氣奪名王帳覆軍陷

囚虜此志乃大妄一為情愛牽遑恤身名喪縷縷中郎
書挽使同跌踢安知臣節恭之死不易諒河梁執別處
出語謬惆悵家聲故煒赫三世漢飛將兵法有死生人
運迭休旺忠回在信史豈沒功罪狀馬遷當腐刑強欲
雪其謗土思豈能無層雲塞亭障千年麒麟圖吾將執
玄鬯

五月八日至上都國子監作

今晨得佳馬驛行趨上京卻顧沙卷幕前瞻車載旌翠

華戒鳴蹕肅肅遠有聲馳道無十里雲開雙闕明跡既
阻奉引班非陪列卿言尋園壁宮紆徐臨雉城第地三
數畝虛堂十餘楹稍加溉掃勤得遂憇息清韓公博士
年實教東都生今我再冗官懷鉉從北征古來玄朔地
雅頌亦鏗轟豐邑德甚廣韋編義尤精前修有軌轍後
生多俊英抑將授何業可使器早成寧無子衿刺僅免
吏牘嬰高居謝暑濁廣矣羲皇情

曉發龍門次獨石賦呈楊廷鎮修撰

日日思南歸乃逆北風去北風不貸客吹雪作寒沍明
當發龍門一昔屢驚怖男兒事結束辛苦在岐路奉命
有程期邇迴豈我據沙平占斗行野斷蹴冰渡重貂襲
裘帽矯矯若紈素據鞍肌骨痛勁氣腸內注口鼻一吸
噓噴嚙鬚上露露泣已成澌虬張本非怒瞻前獨石近
投館薪火具聯鑣有佳友執醢起相語我實孱懦姿踰
五已斜暮隩居尚少欣遠役宜多懼明廷集鵷鸞燕雀
一二數曷不捐半菽咏抱隨所慕置危而易安正以縈

爵故先廬越西陬亦有返耕處吾聞知幾士顏子其殆
庶翩翩不遠復綽綽有餘裕贈君白雲篇還我歸田賦

乘海青車過赤城鵬窩

小車簾為巾中箱劣容坐服轅一牡良貼勒兩驂佐輕
行涉嶺坂捷若風鵲過手雖息鞭箠身已倦軒簾世間
取快事往往遭蹶挫吾歸亦是客奔迫理誠邴緩馭良
自佳山光曉來破一瞬數里踰浮青猶幾箇逢迎不我
舍知我行意情故園果下鉤三歲想勝馭閒從白社遊

間即豐草臥成吾看山福豈不在老大

送俞伯貞祝蕃遠下第南還三首

闕塗將進賢設科大蒐羅有司執衡度稱物平無頗一
語不從律萬言徒自訛微伸已什百小軋能幾多完此
不雕玉虹光亘巖阿

其二

栖遲兔園讀已復澤宮射兩豪吾所賢九軌看方駕奈
何恩子弟竟使劉蕡下文章如羣龍其智可變化乘乾

忌孤剛君子有時舍

其三

北學自姬孔此道日星垂
春陵建南標紫陽煥重徽
何嘗限風氣但務開民彝
我昔弄詞翰屢亦逢黜咍
歸歟理吾書與子指秋期

十二月七夜畏寒無寐閱陳景仁都曹雲南行
卷為和雜詩八首用其韵而不用其意蓋景仁
之作在賦詠而予之狂言則發於興比之間要

不必同也

古樂入今耳間歌纔一成頌鐘在高懸浮哇不能聲彼
昏但坐睡我聽心和平曷不薦廟郊使之配咸英式觀
三雍拜遂陪千畝耕

其二

天驥不可得我嘗有其圖非無相馬法僅出智之餘驥
駟與騶駘一一隨指呼蹠齧性豈異區分意何歟求之
銜檠間徒以利為漁卑哉論形似蹄涔語江湖

其三

豪氣久已無詩成差自喜是中高高樓安敢臥餘子十
步九跋蹇百年三仕已方輪豈能行曲几無足倚有田
歸去來編名附閭里

其四

青山引寒望趙北與燕南孰云古人跡不使今人探謬
從下士秩章服裏朱藍聽雞鼓統統懷謁府潭潭辱顏
入我夢五年心內慚此邱元不愚彼泉豈其貪一笑擲

憂患浮曦在圓庵

其五

日月相麗行有時而昃虧君看明堂柱基構實丕丕人
心即天理何嘗有欹危制政自帷幄流風被疆陲轉旋
乾坤正綱紀賴不隳已日歎乎草繼明仰重離歲功適
已成初寒無怨咨

其六

嘗聞學道人即有以觀無如何彈缺聲嗟嗟為車魚董

生漢儒者卓哉彼丈夫當時江都相豈視大梁屠仁義
言藹如我興久踟躕

其七

陳君自少年高步已青霄邇來鞍馬間髀肉漸漸消美
玉琢廟堂胡不舟以瑤乃令坐郎署兩鬢日蕭蕭君子
尚難進躁夫率狂飄皮冠豈非禮寄謝虞人招

其八

大龜尺二寸至竟有何神備物使納錫乃在九江濱我

昔用支床吐故以納新苟能避鑽灼何必愧泥塵養生
實有主徇名豈其寘

舟次衢州

迢然青霞君問我廿年別南洄復西沉有行何屑屑京
塵苦未浣玄葆變霜茁是身本不賢吾計乃自謫情知
祿萬鍾顧豈在筆舌毛錐強解事塗林豈駕說從誰飾
竿牘若已負羈紲停舟此水濱滯慮一漂雪可能招翔
鸞為爾恨啼鳩珍重幽桂叢高枝待予結

晚泊貴溪遊象山昭真觀

舟行弋陽道山石多異狀嵌空露鍾竅屹立儼珪甃
泐百數里礫鐵森相向最奇象巖下仙館占丹嶂舍櫂
遵微行松篁插雲上開門看青壁左右挾高閭飛雨灑
面來輕飈入簷颺道人出迎客牖戶坐南嚮延登昇仙
臺境肅神滋王不知日車側但覺天宇曠我生名山遊
正費屐幾兩采真喜初遇戀勝期屢訪布帆催夕舉未
敢恨飄蕩水深彭蠡湖回眸更東望

杜家三舅潯陽官滿明年當致其事來洪都取
薦牘卻攜家東歸畱連數旬醉吟惜別

舅家內外嫻十七著門閥鼎遷變則大強半異存沒沒
者風燼銷存者枯株杌宦遊四十年翁今亦華髮征商
上考第休致迫期月取別來枉途親情為之竭小畱寧
久久仰見圓蟾缺官餐無厚味歸袂當明發言尋九江
柁轉上吳門筏還山朱夏初生事及薇蕨歡顏撫羣穉
一洗道間暘仕宦至懸車如射釋於筭又如解奔鞅回

謝彼銜檠遂收塵土軀併棄權門謁百年百醉醒飄風
幾何忽背雖無鮐文頭已有壽骨飲水看三邱青山青
碑兀

送劉叔謙赴潮州韓山山長

揭陽海陬郡谿谷藏霧毒買區乃在城積居跨南服凡
今仕者往喜氣溢僮僕非輕萬里途蓋善千金蓄子行
攜束書言就韓山讀韓山祀昌黎有酒有肴蔽騎麟想
未過盼盼攬遺躅汎除蠻風清沾漑時雨足以茲為教

首如日升若木何必鰥避溪已看雞應卜今人慕古人
未免傷抑促儒官實閑散歲廩七十斛飽飯取詩哦雲
月與追逐寧無趙子徒彈琴和予筑是將寶裝橐果勝
美梁肉毋羞宦轍卑所志三年穀子其厚韓山聽我歌
獨漉我歌儻無證併訊兩黃鵠

康端玉蔡輔之和予言懷之作清整可愛因再
用韵答贈二友

自吾得二友所譚皆古初如臨左右鑑并引後前車相

觀善已至薄發穢全除詩成諷在口道契徵諸書並秀
方卓爾蚤衰獨紛如念茲鈇槩業未棄撲斲餘衆塵適
可厭一袂豈勝拘間因邪轍仆覆謂正途迂賦無藉鸚
鵡祀有及爰居大雅屬窳濶斯文竊涵濡自彼柯葉改
何嘗本根無裁將麒麟罽飾作馬牛裾世雖渾空假聖
猶公毀譽虞箴不在獸士擊僅如狙凡物有合氣非秦獨
能廬區區學章句咄咄事歌歛若已困糠粃從誰問薪
芻洎流積至海廣陌莽成墟吾徒慎修習世好等乖疎

蚩蚩善賈者取謚信為愚

林敬輿將赴宜春筦庫之任過鍾陵訪予官舍
道別來出處相對惘然即賦為贈

吾聞昭文氏鼓琴息其生聽者耳無聰謂琴有虧成玄
木朱絲絃備之以聲形奈何至治音卒負不平鳴敬輿
江夏來又欲西南征濶別十五年撫鏡各星星人生不
滿百憂患每相嬰覆鼎有傾否僨車無折衡霜松獨抱
正受變愈青青桓臧已糞壤孔孟猶光晶儒者有要歸

體用實兼行無輕平準書操奇制其贏此事足為理豈
以仕易耕三歲如風花瞥眼秋葉零宿桑尚可戀息炬
自全明宜春州郭小山水刻且清便將變爍比益使賦
詠精妍辭難為好苦力特易盈滿我塵土胸漱君瓊瑤
英進琴出寐語為悉別時情

送富州章仲實判官解歸

豐城縣為州民若事叢脞雖憑節制尊未底桁楊卧吾
原共理心憂不在吏課授人以太阿芒叅能勿挫章君

一屏星駕用良馬馱人言甲科郎屈跡郡丞佐置之奔
輪間寸跬無少蹉夫知勤保惠不計減寒餓才多適自
煩有席不煖坐最其芻牧功連隴富杭稷君去誰則來
毛髮責吾過今年秋風高更畏茅屋破吾聞為歎息此
道無坎坷詩書有利澤元造所苗播是心苟不存卿相
徒爾大起瞻東壁明詎患南箕簸君懷有至寶萬金難
並貨慎德抑良圖餘事堪一唾行舟未覺遠雲樹渺千
箇寄聲執法家須君警貪惰

鄭萬里再赴廣東辟書題其所藏深村晚景圖
因以贈別

江西到南海滿橐貯山川融液出賸語泉珠瀉勻圓誰
無疑意致我見皆雲烟餘情在所寄手把無聲篇褰開
攬秀色羣玉數峯前洪厓顧之笑言嘗拍其肩豈有雙
太阿埋晶牛斗邊寒廳夜來夢五羊載五仙騰景道君
御海童歌後先澗中菖蒲根綠節如蜿蜒溉烹作鼎實
薦進旅盤筵是物能益氣於人可長年唯應雲中君解

願為君妍功名來無期進思方沛然題詩代畫記蹇淺
詎堪絃

題牕外木粟叢

木粟比經雨抽稍將過尋藩籬苦不高爭長意駸駸愛
此莖葉間綠縹映蕭森簷前數步地藉以成幽陰稍令
晨光薄豈憚午暑侵我屋如橫舟風來一開襟淮浦萑
葦岸越江篁竹林似人見眉睫失喜聞挈音薪秭供歲
晚糗糧待秋深小得償作勞不歸如此心

貞一鍊師遺舟輿招遊玉隆留詩山中

故人丹邱侶招我雲林行雲中逍遙君高居白玉京不
知幾塵隔笑領相逢迎肩輿五十里細路田間縈半途
迫曠黑一炬借微明映壑臺殿出入林風物清曠然莽
蒼墟翠氣鬱崢嶸仰見星斗光安眠已三更晨升紫蘭
藉辦香致吾誠何期奔走中獲踐仙者庭晉柏已槎枿
柯葉尚青青海桑知幾換風霜亦屢驚使非丹液滋即
是劍氣精至今咳陛邊鸞鶴時來停五馬昔浮江龍戰

方縱橫楚氛則甚惡觸波多駭鯨神兵一飛出坤道載
承寧悠哉微禹歎但詫仙道成班班函白迹古石託堅
貞如求造化樞揣想以其形白雲在遙天何嘗繫浮蒸
已去忽復來神存於杳冥四溟環五嶽茫茫大八紘仙
君所過化山川寶揚靈年年八月秋來歸雲作輶至人
懷其鄉其心常怍怍麻姑後千載時猶過蔡經弭節城
陽宅亦有許宣平錦帷雖飄去闕堂樹瓊旌况茲賢主
人重有能詩聲口吟藥珠篇手攀琪樹英客至輒授館

命庖羞膳烹時春雜花發景風暢新晴開軒得憇息衆
鳥方嚶嚶覽物忽有興睠然懷友生京遊我維舊嘗同
車笠盟既果名山期復愜滄洲情申歌不成章聊希蚓
竅鳴

渡湖宿麻子港

青山彭蠡尾湖水始生岸一舸破微瀾風帆用其半亂
流二百里午發至未軒蒼茫洲景中明滅津烟畔數家
小聚落漁竈倚灘繫舊聞荏苒蒲間弱肉飽強悍時平道

路清跋涉得無患
豈非年穀豐禮義
能服叛嚴嚴主湖
神牲酒滿杯案乞
靈我豈敢雲黑檣
鳥散艣師促轉柁
軋軋鳴鶯鷁前瞻
麻子洲波面明星
爛新別重有懷縣
情如此燦

重遊象山昭真觀
憇祝丹陽齋迨晚
登舟作

偈仄小舟中動目
喜清曠僊山在眉
睫彩翠分千狀林
扉延客步入谷跡
逾放濶广如屨廊
灑瀑層雲上不見
泉液滋但覺池流
漲烟霞儘清淑草
木無穴長古人所

題字鐫刻尚遒壯不然身後名千載有真妄山中丹陽
子與我同雅尚京華十年別相對宜夢想髮變將還童
藥成猶靜養褰閭曲密房苦筭煮可餉病身正怯飲坐
息得疎暢欲起復徘徊簷陰稍移丈東歸路更長篙師
催進榜

我昔京城居

我昔京城居思山見山少今還蓬廬卧山雲日繚繞青
山如高人特立萬物表方思謂有饜久既復不飽門前

再成邱其上可延眺岡巒四塞中蔽翳一蓋小烟雲所
出沒變態異昏曉宇宙幾塵漚心目俱照了孰大渾鴻
濛孰細入芒秒不必載尻輿超騰閱齊趙茲惟龜殼屋
左右幕簷篠習忘我豈能況欲觀其微靈景既內澄游
紛徒外擾推琴跋殘燭閉戶月皎皎

曹尊師求白雲樓詩

鍊師養母處白雲藹丸丸朝飛映皓鶴暮逗隨青鸞興
言芝朮食未貸菽水歡每年不滿百真歸葬空山雲來

復雲去淚背詎能省飄飄簷前景杳沒堂上顏茫茫天
地間人雲同一觀故雖僊者形安能久堅完逝川日云
云理定無回瀾名教信可樂孝行垂不刊吾聞樓居人
鋤雲種琅玕大丹幾時熟吾當候仙壇

昔仙華方先生晚最嗜吟吾鄉詩道嘗一昌矣
自公下地寂寥無聞余每深嘅於斯閒居多暇
方裒公手澤為卷得公山中竹醉日感舊寄贈
之作輒追次其韻寫寄其嗣子壽父孫壻吳立

夫

猗嗟巖南叟久化冥漠君巫陽不下招宿草荒秋雲篇
章一二在旖旎揚餘芬誰昔開雅頌世方疎典墳重此
窺制作悵焉遠興羣道散五十載於今歎彌文叵窮積
石原但涉九河濱不知忝離降遂及東門粉公誠後死
者幽明已中分絃歌三百首烈火豈俱焚向余忝末至
於茲愴前聞嘉穀雖屢歎旱苗猶足耘嗚呼召公臣閔
下如蒼旻胡不扶雅道廓然蕩埃氛公詩載揚熙與世

析朝醺

十一月十六日為僊華先生寓祠植碣於其墓
北化城僧舍里之交友咸來會祭歸而成詩用
識斯事

先生隱仙華卒葬仙華麓淒其十霜露墓草今幾宿永
為不朽事誅行當有屬業鉅自宜久才微豈堪服重予
師友義龜勉承記錄鋪茶雖弗工序述皆可覆平生有
道碑此筆知不辱但嗟無繅藉吉薦忝嘉玉成碑懸空

後合置庭之曲奈何荒阡中風日所飄暴乍可牛厲角
敲火防童牧十夫昇致之寄幕託僧屋并為近墓祠料
泉薦寒菊交朋響然臻杖屨或不速意氣有歆動夫豈
為肴簋茲山望其廬數里入陰谷離離紫翠間歷歷盤游
躅定應挾飛仙時來蔭雲木微吟應吹鶴高舉還騎鵠
誰家松栢墳行鹿不敢觸運往無須臾夷壤已為陸春
花照黃墟有酒無茅茵先生死布衣桐棺僅能束葆茲
泉阿藏免彼塗芻蹴斯文在天地千歲如轉燭顧其不

亡者往過來已續雖微豕瘞文尚有藁充簾清詩數千
篇一一汰魚目簡蒐付方來後死慚不穀藏之於名山
斯言可予復

秋往蘭溪訪吳正傳錄事

終歲困拘欝出門欣有行策蹇輕百里駕言尋友生是
節秋雨歇新霜初戒晴柏林朝日中絳纒綴珠英青山
似為我出此相逢迎雲卷原野闊潦收沙水清入嶺復
出嶺江蹊抵微平古塔如枯椿冠山表孤城投館已曛

黑昏燈照初更有形即有役百歲徒營營幸茲閒放日
且無塵務嬰初非怵所畏其來為交情吾人文字歡至
味若鉶羹又若朱絲絃三歎有遺聲所以麗澤益展然
君子貞學功苟堪補過時豈無成安得縮地法念來頻
合并

寄題蘭溪州學挹翠軒貫子素使君題榜

庠齋小如舟雅與東風對東風動層翠飄落楹戶內時
春宿雨過芳事適已退松高或千尋草長將再倍衆綠

乘風來掩苒發朝采廣文曹務簡宴坐得神會長歌樂
泮詩小息元戎隊白酒彼何功青山吾堪愛名軒以其
實心賞惟有在枕藉山水間未省著闌闌斜陽隱江郊
正與飛鳥背峯端片雲出舒卷亦多態誰持白變蒼強
挽明入晦人生郵傳耳百歲幾更代不朽不在名毋庸
嗤湛輩

五月十一日瘞天後獨坐齋中感歎成詩

吾兒志端完不與短折類受命胡弗長灾疾併為厲始

疴謂旋愈荏苒半暮歲醫來為我言咎證在肝肺飲齊
兼涼溫補腑瀉肝氣善方無奇功蓋有利不利數宵齊
增劇一語無惴畏藥食方在咽冥然如大寐兒年纔十
三犖犖具成知雖微警敏姿強學差有志八齡入講肆
玩愒不一二何嘗踈筆墨頗似好文藝吾宗久哀落望
以無失墜咄哉桑榆晚見此芝蘭悴三世攻詩書樹德
有餘地中間從薄宦常恐負明義庶期孫曾成食有不
歛穢兒生亦何為天固予術慧不令悅吾老忍更奪之

易中殤禮有服弔哭當為位老吾今望七就木身如寄
愛兒若愛苗盼盼俟成穰將秋忽斬艾造物果吾棄廢
放安足嗟哀顏復誰慰坐齋日方永清風歷軒砌長歌
瘞天詩哀深得無淚

王叔能尚書招遊虎丘歸而有作

闔閭藏窆處白虎卧其丘殉葬劍已化金精猶上浮秦
强事穿伐鬼功協人謀剗腸裂青壁歷髓發寒流樹色
不知古蛟龍鬱相繆蛻影入深窈鐵花綉吳鉤供庖綆

汲餘千人宜浣凍生公昔講經聚石尚點頭至今盤石
上法雲垂蔭庥寶坊何年建凌虛出飛樓北牖俯平楚
西軒延廣疇登臨小吳會萬象一目收韋白題詩後物
華厭雕鏤何哉幽獨君宵然遺清謳茲山起原隰巋形
如覆甌我疑星遊空墮地得長畱不然駕海來六鰲為
載輶現成股舟臺示以聞思修客過閭門西看山幾回
眸是節風日美招携有扁舟旋擢午影亭繫籬野陰稠
行酒進熱啜飲闌歸興適詞客思如雲尚書氣縣秋吾

哀落人後技癢記斯遊謬誤尚可艾蕪穢焉能度

袁文清墓下作

十年漬酒繇不到文清墓遙遙許劍心夢寐傷遲暮千
里來東州九旬縻逆旅諒哉生芻束耿耿復誰語空懷
郭林宗不見王文度山風吹空林更絕重湖去

草堂琳藏主得往年黃晉卿吳正傳張子長北
山紀遊八詩裝演成卷要予繼作因追叙舊遊
為次其韻增諸卷軸

靈源

禪堂生莫寒客至不成宿巖雲忽飛墮深燈出他屋仰
見星斗高闌干轉空曲

草堂

半陂純浸山山空時見景老禪行道處水木餘淒冷文
字豈其機無言坐移頃

三洞

高高三洞門中天開積翠陰火發晶熒坤珍挾竒闕仙

靈倘下來歸吾此焉遲

鹿田

塵飛天宇空石破巖泉古
萎花吹微香林端夜來雨
語客莫題詩山靈忌多取

寶峯

到寺取徑徑危穿林限沮洳
井氣升為雲篁竹高於樹清
風翼我興納履下山去

潛岳

德人久歸泉何異舟藏壑僧廬出櫺鬚楹桷亦頽落回
望芙蓉城雜花香漠漠

山橋

言尋磊磊亭躡雲隨下上澗回洄微流山空答遙響我
已後斯人寥哉得其賞

寶石

餘春不可挽風花吹滿路向來一宿覺寤語知其處却
望北山南城深晝多霧

九日試院諸友小集分韻得口字

今年秋意深，閑門作重九。輕拈糝菊杯，強沃談經口。森然奎壁光，殘星映珠斗。文字入權衡，在懸不在手。我豈能重輕，銖兩差可否。舉手謝西風，此心如此酒。

出試院諸友小集湖中分韻得淡字

棘園坐踰月，滯思入重坎。今晨始超然，放舟事遊覽。前林卉木清，後岸風日淡。雲開兩峯出，秀色手可攬。嘉茲十二友，夙昔共鈇槩。操袂將語離，漂萍易增感。舉醕屢

飲醇實銅還薦醢歡意方未闌夕陰浮掩慘吾人許予
心初豈異肝膽所志續鸞膠毋徒嗜昌歎向風竊有示
君當一笑領

王繼學侍御將赴南臺僕自山中來城候餞辱
惠近詩輒借韻叙別

龍劒久不試精金生繡澁谿上一磨瑩光射秋濤碧凡
物要有真厚形非薄積所以君子心知人恒不失嗟予
始從公深眷蒙引翼追惟三接晝何啻百朋益羈窮苦

相累進寸退已尺徒將鹿豕游企望鵷鸞集鄉部屬建
臺登門恍如昔煌煌執法星照影秦淮白蘭舟曉當發
離恨焉能釋獨憐蓬濯深永與雲霄隔衣衣早歸來申
歌歌赤鳥

題蘇長公書曹侍中與王省副論趙元昊事

古人善觀人其孚如眊龜後是數十年理事可逆推何
嘗爽分寸自足制盈虧夏童昔跳踉勢將撼邊垂生子
實不令貌求惟有幾虎欲既逐逐孤行亦綏綏於時曹

侍中中山擁旌麾相逢輜軒使王駿貳三司謂言國若
鼎寘安毋易危人才出試可邊患稔愆違消釁必思豫
恃吾有足支西樞本兵地舉綱振其維遲當屬之子在
子究所施駿雖踐樞筦夏強適斯時謀弱遂弗振斥去
乃其宜億言不幸中國豈終莫醫坡翁忠義人聞之為
愕眙寫寘尺紙中示作垂世規流傳百年後引貫珠繫
纍清夜一發楮光晶射南箕我觀與衆異慨今誰致之
自古泰治世守道在四夷濫觴起毫芒流末誠渺瀰猗

邨人不作國魔祚已移展卷懷所欽淒風振庭枝

十六夜望月蝕陰雨不見

三五秋正中既望月當蝕公庭修救事縱金控鳴鐃喧
拏走兒穉發召徧巫覡我時適未寢披衣步簷隙飛雨
洒面來空雲稍如幕天應愛厥妃恐懼遭掩抑仗此豐
隆威角彼妖蠶力譬諸藪藏疾舍穢惟汝德兩曜駕兩
輪安行各適職奈何啖食凶須臾成毀壁見過雖有懲
匿瑕乃無迹雨非黨蠶者為天護精魄常情惜良夜良

夜安足惜德刑與陰陽配對初不逆星辰繫天步磨螳
汭歷歷圓顙示無為蒼蒼垂正色稽首父母光千人萬
人覲

讀漢史

博陸在漢庭受遺能效忠擁幼建皇極庶幾社稷功惜
哉惜學術悵滯無有終不知閑家吉卒蹈覆餗凶白日
麗天行過昃已非中雖微駮乘嫌固足戕其宗獨時休
屠音儲子任同識不同抑畏秉臣節不受通侯封謂臣外

國人旅王若羣工詎以旃毳習屈此禮義風薦進後其
黨志冲言乃雍子孫祉報厚七世食勲庸人才如百穀
並收成歲豐立賢果有方湯治何由隆穿穴有攸隙累
善至於崇漢法雖峻厲虞機繫其逢春秋貽典則朗鑒
雙眸空廢書起歎息豈獨悲人窮

送張典史赴江寧

太微執法星下臨維石城城中治兩縣珠光聯玉繩仰
承澄清軌順撫疲瘵氓地大故物衆姦端乃橫生爬梳

方費日更復事將迎薄責亦詬病厚誣俄近刑况茲朱
墨曹走趨候門屏罄折如不容尚憂違指令蓋夫銓鑑
宗職在賢公卿南端操國秉招招有虞旌士以才自致
筮云艱則貞霜風不淒厲詎縱垂天翎盤錯別利器神
鋒發新硎張君懷牒去佐縣得江寧江寧簿書叢堆案
來相仍敏手試料理即見訟詬清仕道若歷級淹時觀
序升祿食三十載未博一衫青遷秩雖左次考第常視
成小住期月爾快陟天衢亨古人重難進每用謙治盈

故能終器業挺然居盛名春華非不佳寒松有餘榮觴
菊酌君別慎哉千里行

題姚文公草書杜詩

公草法得於伯父左丞公
而此卷作於廬山太平宮

草書貴神雋不在加銛鋒端如孫吳兵善守亦善攻合
正當勝筭出奇思變通汎觀造化初足想構結工柳城
文獻家奧學自為宗遊藝踐張素希風盛咸戎褰開大
雅堂倒瀉雲夢胸朝光出紙背百丈飄晴虹早勢已振
突餘吹尤長雄山獠舞幽窟河伯開泉宮收采不一二

恠珍溢其中昔公富清覽弭節匡廬峯峯前羽章館敷
坐紫烟重雪繭晞淨月蘸毫挹飛猷松風助揮灑能事
不匆匆却後三十年劍化無畱蹤易名倍末議私竊百
世公展卷三嗚呼企公其猶龍

宗忠簡公畫像為公外曾孫葉深道作

近古社稷臣生世常不數不能半五百繼見已超卓炎
運昔中否兵氛纏大角掩旆薄日黃張弧北風惡起公淦
陽節仗以障河朔懇懇存趙忠憤極涕橫落扶義亟西

征敵懷為小却佐興靈武功受任留宮鑰主辱臣則何
國勢滋以削回鑾累十疏言諄聽殊藐一死不貸公百士
吁可作企公如列星宵光仰昭灼幾葉外曾孫傳世春
秋學手圖起予觀言自崇勲閣士稚雖則亡隨會尚堪
作廢國今更非雲飛天一握誰能挽江漢為公洗河洛

梁谿謠贈盛高霞道士

梁谿一片月搖蕩綠羅烟玉女採珠回駕龍耕壁田春
去竹花實歲深芝草駢鳳皇招不下遲景惜留田連却望

白雲嶠明星正當天雲中青童君招麾使之前謂言寶
訣書列在瑤臺編蚩尤守局鑰一閱三千年至今海嶽
間光氣常蜿蜒茅龍亦解飛金匱豈徒堅引手探玄策
得之可登仙首路向恒碣西窺臨嶽蓮天壇見日出皓
鶴共蹁躚行攀飛狐塞回薄扶桑淵滄溟挹不滿石廩
小如拳還尋屏風疊鼓柁陵中川調笑呼陸羽濯纓第
二泉但聞丹齊成不見朱顏遷顥露薦承液雄虹為采
壇上下入景中窅然觀化先何必肩洪崖遂將儕儻全

寧能獨不死為我啟真筌大還容草創小劫度沉綿桂
枝倘堪結遲贈遠遊篇

度馬嶺將適烏傷

輿轎陟層巔綫蹊若縣絙先登步尤踖後挽行益艱履
危不數仞避險輒多盤三石立於獨累寘若為安使非
五丁力誰其鑿巔岼松邊取一息影動浮雲端曜靈却
在下身今插飛翰冷風掖車興青露向空溥不知日馭
側但覺天宇慳俯視萬廬落井幹湧微瀾青林綴坳垤

新霜變朱殷客塵將盡歛眞境乃徐還
究觀蓋壤內開闢有此山何年畫疆邑
岡巒屬連環鳥道劣容跡人獸為通
關旅行負薪粲魚貫勒牽攀十步九顛
躓肩賴汗流丹彼誠謀口給老吾迫哀
孱胡為事茲役荒遊起孤跼放情思脫
兔引手招翔鸞復恐血肉軀容易墮榛
巒山靈若鑄我澗聲助抨彈寥哉不遠
復脫粟有餘餐

過哭亡友傅景文墓

傅子於為詩其氣嘗逸發束之就聲律
講條鶩生鵲眉

山正令申殺伐機更活在藁數百篇一一無揀拔佔畢
老於行妻孥窮至骨晚塗從祿養歲月已飄忽歸葬此
邱樊宿土蓬科沒嗟予負朋義不得臨紉紼過車一慟
已林風鳴窸窣佳哉承宗子堂構方突兀封培繁有自
神理固無拂因知鐘金羸初不棄圭撮交情等肺腑悲
喜兩相憂流為掛劍謠庶以開鬱塞

過錢清浦陽江由此入海

浦陽配三江猶以小絮大我家其始源涓流激湍瀨到

茲直達海混混百川會歸墟豈其豐出坎亦非殺羸縮
揔一如真源自霽沛浮舟絕江津浪觸銀花碎朝曦如
青蓮升光破烟靄歸雲回望長鴻飛渺天外

望會稽山

城東鑑湖道水光翻夕鷗雲破青蘿靡稽峯芝掌浮悠
然動予矚玉女開明眸固知穴可探却恐書難求蒲蓮
浩如海微風挾輕舟前山與後嶺導從森幢旒誰將北
斗旗漸進東瀛洲桂枝倘堪折哀白媿重游

月夜下通明堰

挽舟下通明初宵落潮後兩挺纔負輓十夫齊奮肘引
重如舉虛歟過姚江口細水不生鱗月色金光走蟹窟
在蘆根西風吹澤藪開蓬挹微涼衆黔予白首欲持浩
浩歌往和鳴鳴缶隔雲呼長星勸汝一杯酒

過龍山不得留至車廐卻乘小艇至門

矯首上龍山翠氣深盤盤松雲制扁鑰沙月轉灣環沿
沂二十里回牆客扣關山中宴坐人閱世如翔鸞十年

不同夢笑迎發清歡浣我塵土面對君冰雪顏吾生大
自在眠食儘輕安為作十日留閒看飛鳥還

中秋看月有懷正宗

前庭竹栢間月露下如瀉此景不可孤脫巾坐其下露
氣挾清華月光穿隙罅明河耿在天動影兩相射忽如
龍洞中蒸雲雨初夏又如澄江路殘雪在林野我時病
少蘓久已謝盃斚移床着圓蒲小怠容枕藉只愁太孤
絕翫翫不堪把觸屏僕已僵照壁燈將炧絡緯鳴四簷

細聲如合雅前身我不知豈亦饑吟者淒淒感離別切
切懷保社嗟吾風雨交會合何其寡有形即有患孰者
非空假去年東海頭勞筋寄禪舍是節秋正中褰簾掃
風榭正見金背蟄冰輪促高駕潏灩煮松濤丁東響簷
馬倒索無生忍談餘猶炙輶染指密中邊如啖得牛炙
再秋未闊疎為生故閑暇惟餘懷友情不與凡物化遙
憑夢中夢寄訊楞伽夜

朔游卷中有句云成吾看山福豈不在老大此

拙者早退之符也然青山獻秀白日延景羹糗
足飽寵辱兼忘山中之樂殆不過是而福則吾
不知之也歲晏苦寒孤坐無慘用其句為韻賦
十短章以自信先示戴生間或貽諸同志

湯郎豈不仕而多山水情中懷不遠復束身返農耕陳
力嗟既老食功遂無成飲水讀吾書處困維心亨

其二

粵初賢科廢吾年類童烏承家有佔畢衿佩亦朋趨同

時執業人十九為邱墟傲兀憂患中愧獨餘今古

其三

木無青紫椹偶塵文石班鷄梁濡其翼愧此頭上冠幸
保清淨退苦節諧所安山吾耐久友隱几澹相看

其四

祥麟狩而獲僅與犬羊般所不如孤豚在檻猶在山應
龍廼真智天飛薄玄間噓雲自為神施澤何嘗慳

其五

密袂縫我衣厚塏塗我屋食口相煎熬歲計幸中熟兒
童向我言負智寧負腹赫赫起近名容容滋後福

其六

闕

輕世事飲酒思樂豈老衰負初心顏鬢日以改酒
能亂人性強止中自悔飲少固陶然吾心寄千載

其七

一瑟混百竽衆然予獨不是意豈無傳正聽非妄受聖
作不必云肇自孟荀後韓歐望百世仰者若山斗

其八

紫陽繼禹功導川至於海吾鄉三夫子派別原有在斯
文兩曜張羲娥自相代耿耿遡小明後死吾敢怠

其九

行藏常事耳吾以易自考係遡與敦臨何莫不由道物
理數中齊年華客邊老白髮對疎梅持以相媚好

其十

揆時不相先掄材徒爾大吾世屬多艱學絕將無奈逝

者莫予追未來寧寡和衛道固有人惟無抑之過



待制集卷二